

Sekat akses media sosial yang sebarkan propaganda pengganas

KKMM ambil langkah proaktif

Oleh RASDAN AHMAD

KUALA LUMPUR – Kementerian Komunikasi dan Multimedia Malaysia (KKMM) melalui Suruhanjaya Komunikasi dan Multimedia Malaysia (SKMM) telah mengambil langkah proaktif dengan menyekat akses kepada outlet media sosial dalam talian yang menyebarkan propaganda pengganas.

Timbalan Menteri Komunikasi dan Multimedia Malaysia, Datuk Jailani Johari berkata, pihak kementerian telah merekodkan jumlah pengguna internet sebanyak 20.6 juta orang yang mana pengguna aktif adalah sebanyak 16 juta orang pada tahun lalu.

“Perkara itu juga membuktikan masyarakat hari ini lebih cenderung menggunakan laman sosial untuk menyebarkan propaganda pengganas seperti isu militan Islamic State (IS) dan juga pedofilia.

“Purata pengguna internet melalui komputer sebanyak empat jam 38 minit sehari dan penggunaan internet melalui telefon pula sebanyak 3 jam 37 minit sehari.

“Ini menjadikan media sosial sangat berkesan untuk merekrut ahli-ahli baharu,”



JAILANI (barisan depan, lima dari kiri) bersama Dr. Nor Ghani (barisan depan, empat dari kiri) dan pegawai serta para pelajar UKM menunjukkan tanda bagus pada Majlis Perasmian Bual Bicara Isu-isu Semasa 2017 di UKM, Bangi semalam.

katanya pada sidang akhbar program Bual Bicara Isu-isu Semasa 2017 yang diadakan di Universiti Kebangsaan Malaysia (UKM), Bangi, Selangor semalam.

Turut hadir Pro Naib Canselor (Penjanaan dan Prasarana) UKM, Prof. Dr. Nor Ghani Md. Nor, Dekan Fakulti Sains Sosial dan Kemanusiaan UKM, Prof. Dr. Ekhwan Toriman dan Pengerusi Pusat Penyelidikan Impak Media dan Industri Kreatif Fakulti Sains Sosial dan Kemanusiaan UKM, Prof. Madya Dr. Mohd. Yusof Abdullah.

Menurut Jailani, sehingga

Disember tahun lalu, SKMM telah berjaya menyekat 32 laman dan 72 pautan dalam bahasa Melayu dan bahasa Inggeris yang terlibat dalam menyebarkan ideologi IS.

Dalam masa sama, beliau turut menyarankan generasi muda menanam sikap tabayyun dalam diri iaitu menilai kesahihan sesuatu berita sebelum disebar.

“Justeru, ibu bapa perlu memainkan peranan mengawal dan memantau aktiviti anak-anak agar mereka tidak melayari laman-laman web berunsur negatif dan lucuh yang boleh

mengundang masalah sosial.

“Saya menyeru agar ibu bapa bertindak tegas dalam penggunaan media sosial dalam kalangan anak-anak, malah penerapan nilai sosial dan kerohanian perlu disemat dalam diri anak-anak,” katanya.

Jailani memberitahu, kes penderaan seksual kanak-kanak di Malaysia ketika ini berada pada tahap yang membimbangkan.

“Sikap keterbukaan ibu bapa sendiri yang mengundang kepada kejadian tidak bermoral ini. Anak-anak muda seawal usia 12 tahun tanpa segan silu

memuat naik gambar-gambar seksi di media sosial untuk ton-tonan umum yang membuka jalan kepada kejadian yang tidak diinginkan.

“Disebabkan perkembangan teknologi pada zaman ini, penggunaan internet lebih mudah diakses khususnya laman web pornografi dan mangsa utamanya adalah kanak-kanak,” katanya.

Menyedari pentingnya isu tersebut, Seminar Jenayah Seksual Kanak-kanak: Hentikan!! akan diadakan di Pusat Dagangan Dunia Putra di sini pada 13 dan 14 Mac ini.

Seminar itu dianjurkan bersama oleh Program PERMATA yang dipelopori oleh isteri Perdana Menteri, Datin Seri Rosmah Mansor dan Jabatan Perdana Menteri (JPM) serta beberapa buah agensi kerajaan termasuk KKMM.

“Penganjuran seminar itu adalah untuk meningkatkan kesedaran orang ramai terhadap jenayah seksual kanak-kanak dan cara melindungi golongan itu daripada sebarang ancaman jenayah.

“Seminar itu juga bertujuan mendapatkan komitmen daripada semua pihak untuk mencegah jenayah ini daripada berlaku,” jelasnya.